

23. oktober 2018

UKA2018/108

Inissianik attartortitsisarneq pillugu Inatsisartut peqqussutaani nr. 2-mi, 12. maj 2005imeersumi ilanngussaq 4 (Ileqqorissaarnissamut malittarisassat) allanngorteqqullugu Naalakkersuisut peqquneqarnissaanik Inatsisartut aalajangiiffigisassaattut siunnersuut, taamaasillunga tunngaviusumik pisortat inissiaataanni qimmeqarnissaq aamma/imaluunniit qitsuuteqarnissaq akuerineqarsinnaalersillugu.

(Inatsisartunut ilaasortaq Randi Vestergaard Evaldsen, Demokraatit)

Inatsisartunut ilaasortap Randi V. Evaldsen Demokraatit inissianik attartortitsisarneq pillugu Inatsisartut peqqussutaata allanngortinneqarsinnaanissaa siunertaralugu qimmeqarsinnaaneq qitsuuteqarsinnaanerlu akuerineqarsinnaalernissaannut siunnersuutaanut imatut Siumumiik oqaaseqassuugut.

Nunatta ilaani "allamiut" qimmiinik eqqussisinnaaneq inerteqqutaavoq aamma taamaappoq qitsuuteqarneq eqqarsaatigalugu. Nunattali ilaani qinnuteqaqqaarnikkut qulaani taaneqartunik uumasuuteqalersinnaasarlutik.

Paasinninnerput malillugu uumasuuteqarsinnaaneq pisinnaavoq piginneqatigiillutik inissiaatileqatigiffimmiut namminneq malittarisassaminni isumaqatigiissinnaagunik, aammalu soorunami attartortitsisut namminersortut namminneerlutik akuersisimappata uumasuuteqarsinnaanerup pisinnaanerani. Tamanna siunnersuuteqartup aamma ilisimalluaraa qularnanngilaq.

Pisortat inissiaataat nunatsinni tamani siammarsimallutik attartungaapput, taamaammat pisortat inissiaataanni qimmeqartalersinnaaneq qitsuuteqarsinnaatitaalernissarlu eqqartorneqassappat nunatta kujataani taamaallaat atuutilersinnaasoq Siumumiik isumaqarfingaarput.

Inuppassuuvugut uumasuuteqarnermik nuannarisaqartuusugut, aammalu ilisimannittut uumasuuteqarnerup suliassartaqagaatsiarsinnaanerani. Qularnanngilarlu pisortat attartortittagaanni najugaqartut uumasuuteqalerusukkaluit tamanna ilisimalluaraat.

Taamaammat siunnersuuteqartoq assortornangu, kisiannili nunatta Avannaa Kujataalu assigiingitsunik inatsiseqarfigineqarnissaannik piumasaqarluta Siumumiik ataatsimiititaliami suliarineqarnissaa innersuupparput.

Jess Svane, Siumut